



Sesida dals

Communitgà ils

Protocol nr.

9 da favrer 2021

10 da favrer 2021

119/2021

Incumbensa Hofmann

concernent las posiziuns da cader e da direcziun en l'administraziun dal chantun
Grischun

Resposta da la Regenza

A la Regenza èsi enconuscent che la maioritad dals posts da servetsch ed er la Chanzlia chantunala vegnan manads dad umens. Medemamain èn ils stabs e las posiziuns da cader dals tschintg departaments occupads per gronda part cun umens. I na po er betg vegnir snegà che mo mintgamai ina dunna è vegnida elegida l'ultim temp sco manadra da l'Uffizi per la scola populara ed il sport resp. sco vicechanceliera.

La renfatscha da las sutsegnadras e dals sutsegnaders, che la Regenza n'haja betg anc chapì ils segns dal temp, vegn dentant refusada. D'in cuntin vegnan realisadas mesiras per cundiziuns da lavur modernas per stgaffir ina meglra cumpatibilitad da la professiun cun la famiglia. Uschia spera la Regenza che dapli dunnas s'annunzian er per posiziuns da cader e da direcziun.

Or da l'incumbensa Schwärzel concernent plazzas parzias sin tut ils stgalims dal cader (sessiun da zercladur 2019, PVAU 7/2019) ha la Regenza deducì il punct central da svilup "Patrun attractiv" ed integrà tal en il program da la Regenza 2021–2024. Sin basa da questa incumbensa èsi ultra da quai vegnì introducì che las plazzas a temp cumplain da tut ils stgalims ierarchics vegnan mintgamai publitgadas cun in grad d'occupaziun dad 80–100 %, uschenavant che quai è pussaivel resguardond las relaziuns ed ils basegns manaschials ed organisatorics.

Plinavant è l'incumbensa da la fracziun da la PS concernent in plan d'acziun per l'egualitad tranter dunna ed um en il Grischun (sessiun da zercladur 2019, PVAU 5/2019) vegnida respundida en moda affirmativa. Perquai che la Regenza è da l'avis ch'in plan d'acziun cun strategias e cun mesiras concretas saja in instrument adattà per meglierar tranter auter la cumpatibilitad da la professiun cun la famiglia, per far frunt a la mancanza da persunas spezialisadas e per posiziunar il chantun sco patrun modern ed attractiv, ha ella concludì il december 2020 d'elavurar in tal plan d'acziun. Il project equal21 è dividì en quatter fasas. En l'emprima fasa vegn erui il stadi actual da l'egualitad. En la segunda fasa vegn nominada ina gruppa da lavur interdepartamentala e vegnan elavuradas finamiras e mesiras per ils departaments resp. per lur

posts da servetsch e per la Chanzlia chantunala. En la terza fasa vegnan realisadas las mesiras. Ed en la quarta fasa vegnan quellas alura evaluadas. Las lavurs per il plan d'acziun duain cumenzar quest onn ed esser terminadas previsiblmain la fin da l'onn 2024. Ina da las finamiras dal project è gist quella da cuntanscher ina tscherta egualitad tranter dunnas ed umens en il cader. La Regenza vules realisar il project equal21 ch'è gia vegnì instradà e giuditgar ses effects areguard l'egualitad, avant ch'i vegnan prendidas ulteriuras mesiras en cas da basegn. Tuttina duain las mesiras da la Confederaziun vegnir examinadas en il rom dal project e vegnir surpigliadas, sch'ellas èn adattadas.

Las sutsegnadras ed ils sutsegnaders pretendan plinavant che la Regenza procura ch'ella sezza, las persunas che proponan l'occupaziun da las plazzas sco er las persunas che fan la recrutaziun, vegnian scoladas correspudentamain. Tut las publicaziuns da plazzas libras da l'administraziun chantunala vegnan liquidadas sur l'Uffizi da persunal. La recrutaziun sco tala, en spezial ils discurs da preschentaziun, sutstattan a la responsabladad dals posts da servetsch. Damai ch'il manader da l'Uffizi da persunal è dentant commember da la cumissiun directiva dal project equal21 e cunquai che l'Uffizi da persunal salva mintga onn ina dieta cun las persunas dals posts da servetsch ch'èn responsablas per il persunal, pon novas enconuschientschas vegnir integrads directamain en ils process da recrutaziun da l'administraziun chantunala.

L'ultima pretensiun da questa incumbensa è quella ch'il Post da stab per l'egualitad da las schanzas duaja sustegnair la Regenza cun sias enconuschientschas specialisadas. Da quest sustegn fan la Regenza e l'administraziun chantunala gugent diever. Actualmain è il Post da stab per l'egualitad da las schanzas responsabel per elavurar il project equal21. El è er involvì en l'elavuraziun da la revisiun da la Lescha dal persunal.

La Regenza è pronta d'examinar en il rom da l'elavuraziun dal project equal21 ils puncts tematisads en l'incumbensa e da fixar mesiras correspudentas tut tenor ils resultats.

Sin basa da questas explicaziuns propona la Regenza al Cussegl grond d'acceptar las cifras 2 e 3 da l'incumbensa qua avant maun e da midar la cifra 1 sco suonda: En il rom dal project equal21 vegnan examinadas las mesiras da la Confederaziun ed ellas vegnan surpigliadas, sch'ellas èn adattadas.



En num da la Regenza

Il president:

Dr. Mario Cavigelli

Il chancelier:

Daniel Spadin